

KAWATAN BANGIS TRAYDOR PAANTUS



Tibuok-kusog nga makigbisog aron tapuson ang tiranya ni Duterte!

Tibuok-kusog nga makigbisog aron tapuson ang salot nga tiranikong paghari ni Duterte sa labing dali nga panahon. Matag higayon nga nagpakabuhong siya sa gahum, labaw nga nagkabug-at ang palas-anon ug pag-antus sa katawhan.

Ilalum sa iyang magtulo ka tuig na nga paghari, labaw nga mikunhod ang panginabuhian sa katawhan ug pagkahagba sa ekonomiya. Migrabe ang disempleyo, mibug-at ang palas-anong buhis ug misaka ang presyo, samtang nagpabiling nalansang ang suhulan ug ubos ang kita sa katawhan. Migrabe ang problema sa droga, ug ang gubyerno mismo niya ang numero unong sindikato karon.

Sa pikas bahin, padayon ang pagdaku sa bahandi ni Duterte ug sa iyang mga kaalyado nga burukrata-kapitalista ug oligarko gikan sa mga kontrata sa gubyerno ug pagkawaw sa bahandi sa nasud. Nagasunud-sunod siya sa mga dikta sa mga langyawng gahum ug ginasurender ang nasudhong soberanya ug patrimonya.

Mikaylap ang gahum ni Duterte sa tibuok nasud. Gigamit niya ang tibuok armadong ku-

sog ug rekurso sa estado alang sa pagpanumpo ug pagpanglingla. Ginapahilum niya ang iyang mga kritiko, mga aktibista, abugado ug midya. Ginasumpo ang pagsukol sa katawhan. Walay-hunong ang mga pagpamatay, pagpangatake sa tibuok komunidad, pagpangaresto ug pagbilanggo.

Gigunitan ni Duterte ang tibuok burukrasya, armadong pwersa ug tanang sangay sa gubyerno. Aron taas nga panahong makalikay sa iyang mga kriminal nga tulubagon, ambisyon niyang palanaton pa ang gahum ug pribilehiyo naangkon niya ug sa iyang pamilya ug kaalyado lapas sa 2022.

Unsaman kakusog ang gahum ni Duterte, dili kanus-a man mapukan ang tinguha sa katawhan nga molingkawas sa tiranya ug pasismo. Dili hingpit nga mapahilum sa ilang singgit alang sa hustisya ug demokrasya.

Katungod sa katawhang Pilipino nga batukan ug palagputon ang usa ka gubyrno nga nagayatak sa ilang komun nga interes ug walay hunong nga nagapanumpo kanila. Sama sa gihimong pagpalagpot sa rehimeng Marcos (1986) ug Estrada (2001), walay laing kinahanglang buhaton kundili ang palagputon ang bangis, kawatan, paantus ug traydor nga rehimeng Duterte.

Sa katawhang Pilipino: palig-onon ang determinasyon aron atubangon ang mahago nga pakigbisog batok sa pasistang rehimen ug tul-iron ang dagan sa kasaysayan sa nasud. Kung maghiusa ug usa ka han-ay nga magmartsa ang katawhan, mamahimo silang usa ka dili mabuntog nga pulitikanhong pwersa ug pwersa sa kausaban.

Tukuron ang organisadong kusog sa katawhan. Ibuka ang mata sa tinuod nga kahimtang sa nasud. Tangtangon ang taptap sa mga bakak ug pagpanglingla ni Duterte. Magpursige nga kaplagon, sabton ug ibutyag ang tinuod nga kahimtang sa nasud, ang kawalay demokrasya ug kawalay kagawasan, ang paghari sa pipila ka oligarko, mga burukrata-kapitalista ug pasista, ug ang pagpangdaugdaug ug pagpahimulos nila sa masang kabus.

Hatagag-pagtagad ang mga hisgutanang pangkatawhan ug panggubyrno. Isalikway ang kawalay pagpakabana. Ilambigit ug puntingon ang ugat sa inadlaw-adlaw nga mga problema ug yangongo. Mahimong magtutuan sa kasaysayan, pulitika ug ekonomiya.

Hugot nga maghiusa. Iwaksi ang pag-iya-iya. Ang kaayuhan sa usa nakalambigit sa kaayuhan sa tanan. Itugyan ang tanan aron tukuron ug palapdon ang mga organisasyon sa masa. Pakusgon o tukuron ang mga unyon

sa mga pabrika. Tukuron ug palapdon ang lain-laing organisasyong masa nga naghiusa sa mayorya o labing daghan sa mga eskwelahan, upisina ug komunidad.

Hiniusang molihok ug ipadayag ang mga yangongo sa mga hisgutang lokal, pangsektor ug pangkatawhan. Makigbisog alang sa umento sa suhulan ug katungod sa mga mamumuo, aron paubsan ang abang sa yuta o interes sa pautang ug makatarunganong presyo sa humay o uban pang produkto, batok sa pagsaka sa matrikula o pagtalikod sa estado sa edukasyon, batok sa demolisyon, batok sa mga dili makatarunganong mga balayronon, ug uban pang hinanali nga pangayo. Isumpay kini sa mas dagkung hisgutanang nasudnon ug ilambigit sa pakigbisog aron tapuson ang tiranikong paghari ni Duterte.

Tahas sa mga aktibistang masa nga pukawon, organisahon ug palihukon ang gatasan ka libong katawhan sa kasyudaran ug kabanihanhan. Mahimong makina sa malukpanong pagtuon ug pagpropaganda sa masa. Pangu-luhan ang mga diskusyon, mamulong sa mga tigum, manghatag og mga polyeto sa kalsada ug mamintal o mangdikit sa pader og mga panawagan. Kumbinsehon ang tanan nga hiniusang molihok ug mosukol. Ihatod sa masa ang mensahe ug mga panawagan sa Partido.

Pugos nga ginasiak-siak ni Duterte ang katawhan aron padayon siya nga makabansiwig ug makahari ang mga hungog nga sama niya ug sa iyang mga alipures ug kakunsabo. Kung organisado o hiniusang molihok ang milyunmilyong katawhan, walay gahum nga makapakang sa ilang paghukom nga palagputon si Duterte, iasdang ang kausaban ug itakda ang kapalaran sa nasud.

Partido Komunista ng Pilipinas

